



11. juni 2026

UPA2026/189

**Uunga siunnersuut: Nunami naalackersuinikkut aqqissuussinermut Tunngaviusumik Inatsisissatut missingiut Inatsisartunut ingerlatitseqqinissaannut Inatsisartuniillu akuersisummik pinissaq pillugu Naalackersuisut inatsimmik missingiummik suliakkerneqarnissaannik Inatsisartut aalajangiiffigisassaattut siunnersuut. Missingiut Inatsisartunut kingusinnerpaamik UPA2027-mut saqqummiunneqassaaq.**

*(Inatsisartunut ilaasortaq Pele Broberg, Naleraq)*

Siullermik Inatsisartunut ilaasortaq Pele Broberg siunnersuummik pingaarutilimmik saqqummiussineranut qutsavigissavarput.

Siumumiit Inatsit Tunngaviusussaq pillugu Isumalioqatigiissitat ukiuni arlalinni suliaqarsimanerannut immikkut qutsavigaavut. Inatsit tunngaviusussatut missingiut inuiaqatigiinnut pingaarutilimmik oqallinnissamut pitsaasumik tunngavissiivoq.

Inatsit tunngaviusussatut missingiut pillugu inatsiseqarnikkut pitsaassusaanik § 21 pillugu Isumalioqatigiissitap nalilersuinerata saqqummiunneqarnissaa Siumumiit qilanaaarput. Isumaqarpugut tamanna pingaarutilimmik alloriarnerussasoq, inatsisissatut missiliutip inatsisilerinikkut inuiaqatigiinnullu tunngatillugu nalilersorneqarnissaa eqqarsaatigalugu.

Peqatigisaanillu Naalackersuisut kaammattorusuppagut innuttaasunik annertunerusumik paasititsiniaanermik aammalu peqataatitsinermik aallartitsisoqaqqissasut. Inatsit tunngaviusussaq allagaatiinnassanngilaq, taamaattumillu inuiaqatigiinnik akuutitsinikkut peqataatitsinikkut qaammarsaanikkullu pigineqartutut misigineqartariaqarluni. Taamaattumik innuttaasut amerlanerusut suliaq pillugu ilisimasaqalernissaat aammalu oqallinnermut peqataatinneqarnissaat pingaaruteqarpoq.

Siumumiit Inatsit tunngaviusussaq pillugu suliap ingerlaqqinnissaa kissaatigaarput aammalu qilanaarluta malinnaaffigissavarput. Siunnersuuteqartullu siunnersuummut tunngavilersuinermini Inatsisartutigoortumik Naalackersuisunut Inatsit tunngaviusussatut missingiummik allannguisinnaanissamut pisinnaatitsisummik tunniussinissamik siunertaa paasivarput. Taamaattoq aamma maluginiarparput Naalackersuisut akissuteqaatiminni saqqummiukkaat Inatsit tunngaviusussatut missingiutip inatsitigoortumik nalilersorneqarnera aappaagu upernaakkut saqqummiunneqarsinnaalissasoq, tamannalu siunnersuuteqartup piffissaliineranut ukioq 2027-imi Inatsisartut upernaakkut ataatsimiinneranni saqqummiunneqarsinnaanissaa pisinnaasoq. Taamaattumik suliaq marloqiusamik ingerlannginnissaa qulakkeerneqartariaqartoq Siumumiit aamma paasisinnaalluarparput.

Siumumit taasisutissap kalaallisoortaa paasiuminaatsikkatsigu unneqqarissumik oqaatigissavara. Tamannalu pissutigalugu peqqissaartumik Inatsisinut ataatsimiitsitaliami sammineqarnissaa kissaatigaarput.

Taama oqaaseqarluta siunnersuut Inatsisinut Ataatsimiitsitaliamit aappassaaneernejartinnani sularineqarnissaa inassutigaaarput.

Erik Jensen, Siumut